



Regd.No 19134/BB <http://www.kbc.org.in> NAI/220/99
No-G-4/Regd/Magazine/KBC/Thuso/MNP-81

KBC THUSO

Kum 53 Ihinna

Lhalam/September 2016

So 449

CHRISTIAN EDUCATION

minina
DEPARTMENT
KUKI BAPTIST CO
August 7, 2016
Grand Hall, KBC Office

**LEADERSHIP SEMINAR
MEN DEPARTMENT**

OCTOBER EVENTS

- * YOUTH DAY - 09 * MBC DAY OF PRAYER - 16 *
- * CHAGATE NIKHO - 23 * MBC EXECUTIVE COUNCIL - 23 *

John 1:11

'Kapa theng, eini pumkhat thi-Bang a amho jong
pumkhat apitheina ding un, Nangman amkhehi hong in'

CONTENTS

THUMAKAI HO

1. Editorial/ Kigellhah na dihtah	1
2. Socio-Political Reform /Rev. Letkholun Haokip	4
3. Ipijeh a Seminary/Rev. Silas, Haoneo & Pastor Onkho Haokip	6
4. Taona akhohdan/Evan. PL. Kipgen	10
5. Thilpha bolding a sem/ Juliana Doungel	13
6. Mission Column	15
9. Men Column	21
10. Women Column	22
11. Youth Column	26
12. Report	24
13. Condolences	34-36

EDITORIAL BOARD

<i>Chairman</i>	: Rev. Dr. Hawngam Haokip, President KBC
<i>Editor</i>	: Rev. Ngamjapao Haokip, General Secretary
<i>Joint Editor</i>	: Rev. Silas Jangminlen Haokip
<i>Contributing Editors</i>	: 1. Rev. Letpu Kipgen 2. Rev. Henjalen Doungel 3. Rev. Onthang Haokip 4. Rev. Kaikhokam Chongloi 5. Pastor Paokhohao Haokip 6. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 200/-
IndividualRs. 100/- (Post a Rs. 200/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



KI GEL LHAHNA DIHTAH,

(Taking right decision)

Editorial

Gen.13:1-10, sung hi isim leh Abram leh Lot hinkho thusim chomcha akimun ahi, Negeb mun ajon lhon in, chu'a konin Bethel le Ai kikah chan geijin ponbuh ana kison doh lhonin, Pathen in phat thei aboh cheh lhonin ahileh chengkhom thei ahilhon tapon, hijeh chun Abram in Lot jah a chun eini cheng khom thei ihitapoi, ajeh chu nang kelngoi ching holeh kei kelngoi ching ho kikah a hin kitomona um da leh aphai, hijeh chun katao ahije, kei kom a konin ki in-chon tan tin anasei tan ahi, hiti chun;

“nangman veilam nalhah ding le keima jetlam a cheng ting, jetlama nache leh keima veilam a cheng kate,”

tin aseitan ahi. Decision or choice kiti hi co-related ahi, ajeh chu ikigellhah naleh thil ikilhan dan adih lou teng hinkho pumpi chu che khel thei chule hinkho'a kishina um thei ahi. Tahsa lung ngaichatna (Lush of flesh) kitih mihem

*hinkhoà um jing khat ahin, hijeh a chu
Jesus, Juda upa ho henga chu “Numei chu
jon lunga navet jong leh achonse nahitai,” tia
anasei ahi. Dan thua koima them achan jou
lou ding thua aseina ahi.*

*Thusim khat; Nupani hi akiboi jing lhonin
ahileh, nikhat hi pastor pa hi counseling bol
peh lhon dingin achen ahileh a in-neipun
pastor pa koma chun, ken ima suhmo
kaneipoi, ka in-neipi chu counseling bo-
lin ahin titan, hijeh chun pastor pan jong
achutileh ipiti mong2 a chule ipipen a chu
hung kiboi pan nahilhon ham tin ahin sei
tan ahileh pasal pa Judon jeha hung boipan
lhon ahi dan chu pastor pan ahin midoh
tan ahi. Pasal pa akidihsah napa chu dihlou
(wrong decision) joh ana hi khatan ahi. Ra-
bindranath Tagore thuchih sei : **“Righteous
conquer the wicket”** hitobanga chu adih
chun adihlou chu asuh jang theilou leh adih-
na chu phachom lou ahi. Leiset chung a hin
thil ni hi akidou jing in ahi, hichu muthim le
khovah ahi. Eihon iheuin, kho ahung vah
pou pou leh muthim vei pai jeng, chutobang
ma a chu kho ahung jin teng leh kho vah chu
mang jeng, hiche teni phat sunga hi nang le
kei in hinkho iman ahin, hijeh a chu phat
jouse le mun jousea ki gel lhahna or thil ki
lhan dan hi chih thei ma2 angai jin ahi.*

*Tulai vannoi thilsoh ho ivet leh, tijat na le
kichatna adim tan ahi. 2002 news paper khat
kana sim le thilsoh kidang tah khat kana
sim doh in ahi, hichu ; Kolkata a nungah*

ahingmo thim khat leh Uichal aki cheng in, a married bolni lhon in mi 140 aga pangin ahi akitin ahi. Chule meithai kum 35 a upa khat le chapang pasal kum 10 khat akicheng kit in ahi. Hiche ho hi kigel lhahna dih tah chu ahi theina dem, sopite ho. Nu le nu kikoi, pa le pa kikoi kiti hohi kigel lhahna dihtah or aphatah ahina dem. Pathen in Israelte henga chun hitin anaseijin ahi; “ Ven, tunin keiman na masanga hinna le thilpha kakoipeh in, thina le thilse kakoipehê” atin ahi, (Deut.30:15).

Achainan : Abram in Lot henga chu kilhan in anati ahi, akilhan ding kon a chu alungthim'a kigel tei ding ahi, akigel lhahna a konna chu akilhan ahi, hijongle ama ding chun hahsatna le boina ana hi kha tan ahi. Chonset na mun Sodom le Gomerah khopi a chun ana cheng tan vannoi nop sah na tin cheng toh ana hing khom taovin ahileh, hichelai mun chu Pathen lung lhailouna mun chu ahung hitan ahi. Aji ngaitah ana chan lo in, chujouvin achanu teni toh alum khom kit in ama dingin mun akilhan na chu tahsa le lhagaova dingin vangset naleh thina ahitai. Hijeh chun Houbung mite ho, tunia nang le ken ilung gel'u le ihin dan'u Christa kipana thupha toh kitoh hinam or ithil lhan nao leh ikigel lhah naova konna Pathen choi-at naleh ilhagao huhhing na hi ding hinam, tihi igel cheh diuva ikihou lim nao athunei pa, pathen in ibon chaova dingin phat thei iboh peh tao hen, Amen.

Socio-Political Reforms: Role of the Church

(Jalhang Hinkho Semphatna dinga Houbung Mopohna)

Rev. Letkholun Haokip

Hou/Sakho lam kiloikhom nahi mihem khat dinga poimotah le damlaisunga mijousen aboipi khat chu ahi. Sakho hin mihem akiloikhomsah in, hiche kiloikhomna chun- society, insung (family), changval (individual) chuleh leiset kivaipohna (politics) le them-jilna (education) lam ah nasatah in khantou le machal ahin polut in ahi.

Tunin igamsungu ivet leh houbung (Church) hin jalhang hinkho semphat hi hou/sakho lam toh kisai behseh loudana igel tobang uvin akilang e. Jalhang hinkho a houbung kikumlou nading chan umnante, ahin phat chedung juia houbung in pan ilah diuva po-imo kasah ho neokhat kahin sei nom e. Vetshanan- Education Reforms, Electoral Reforms, Land Reforms, Health Concern, Combating Corruption, Drugs Addiction and HIV/AIDS. Aboncha khatveia seidingin saojep intin tuchung hin point khat Education reforms lampang chomcha veuhite.

Education Reforms: Role of the Church

Alhangpia seidingin i-society sunguva lekhathem masa le aching masajep hohi Mission school le Christian missionary hon education ana peh-u ahi ti atamjo inop diu tahsan aum e. Hijeh chun Mission school bollou apoimodan leh education reform umthei nadinga houbung le mimal mopohna chomcha chan veute.

Mission School: Igam sunguva Christianity ahunglut-a tahsa le lhagao a ihung khantou uva tudinmun ilhun theinai hi missionary masahon education einapeh jeh-u ahi. Ahileh tunia Houbungin Christianity hunglut kal kum 100 (centenary) igalkal nunguva educational institution ijat ibol doh tah uvem? Vaicha genthei ijat lekha isim dohsah tah uvem? tin thudoh isem nom uvin ahi. Thinglhag gama English medium school umlou jeh in mi tampin genthei tah in phaigam ahin jon uvin. 21st century-a iumtah vang uvin genthei vaichat jeh-a school kaijoulou igamsung uvah chapang tampi

aum nai in ahi. Hiche hohi houbungin kamopohna ahipoi tithei ahipoi, mopohna lentah inei u ahi.

Hijeh chun Education Policy sem-a thinglhang kho ho - vil- lage level, block level, sub- division le district level chan- a Mission school bolding hi houbungin lunggil tah-a gel- poimo angai in ahi. Houbungin mission school ibol joulou nalah uva government school umho iti vetup ding ham jong policy ineiu angaiyin ahi. Hiche teng chuleh vaicha genthei mun- chom-a chejoulou hon jong le- kha simthei untin, khangthah lekhatem government natoh mujolou ho dingin jong natoh kipethei intin, houbung dingin jong sum le pai muna (income generate) bolnan hungpang in- tin, chuteng houbung chu tahsa le lhaggaova hinna inei diu ahi.

Parents Responsibility:

Education reform atah-a aumthei nadinga insunga aki- pat angai in ahi. Nu le Pa khat jo beh-in jingkah nilhah-a chate lekhasim toupin ding. Chate ho insunga lungmong tah a aumthei nadiuva insung vaipoh ding. Lekhabu hoi le pha ho choh a koi ding. Apat dungjui a tilkhon jing a Pathen kom a taopeh jing ding.

Pastor Responsibility:

Pastor le houbung lamkai hon aphot dungjui themjilna poi- modan ho phatbih neiya thupi ase diu, vetsahnan- simlai ho mopohna, jilkung (teacher) ho mopohna, Nu le Pa mopohna chuleh houbung le society mopohna.

Church Responsibility:

Houbungin simlai lohingho ki- papi dingdol kipapia, tilkhon dinga lomho aphatcha tilkhon ding. High school simlai ho ahithe nachana social ac- tivities ho-a manchah lou ding. Houbung sunga Program poi- mo functions le camping kiti ho School Exam lai le gonlou ding. Education poimodan ho Pathen thu toh kitoh a seiphong ding, simlai ho le jilkung ho taopeh jing ding.

Meeting with Government and CSOs:

Ichennau gam Christian major- ity hihih jong leh jokham kham a government leh gamsunga kiloikhomna umho ahidhe- a student kiloikhomna lamkai hotoh aphot dungjui kimuto- a jilkung kituplou le kivat ho chuleh thil apoimo ho kihoulim khompi jing ding. Next Issue- Political Education: Role of the Church.

Ipijeh'a Seminary?

Chuleh, ipiti?

Why Seminary? and How?

Rev. Silas Boipu, Pastor Haoneo & Pastor Onkho

Thumakai

Tu dinmun in Houbung khantou machalna ding in mission natohna lam a pan ila uvin, pulpit a thusei ibol jing uvin, crusade le camp, taona, la sah ibol tauvin, ibol loulai u aum beh tapoi. Ahin angaikhoh tah khat ibol khah lou u a um e, hichu, Pathenthu Kihilna (Bible/Theology kihil) ahi. Kukiten Pathen ihin hou kal u kum 100 alhing tan tuni chan in atamjo hi Pulpit a thusei (preaching) ah ikivah nalai un ahi. Pulpit a thu kiseihi phatchomna tamtah um jongleh Kihilna (teaching) a um lou teng kibulphuna adetjoupon chomlou kah a goplha loi ji ahitai. Thuchih khat in, "thusei (preaching) hi muchi kithetho tobang ahin, kihilna (teaching) hi muchi kitutho tobang ahi," atin ahi.

Bible a Kimu dungjui in...

Bible pumpi akivetleh Pa Pathen in kihilna akhohsah in (Deu. 6:1), Chapa Pathen (Jesu) in kihilna akhohsah in (Lk 19:47; Acts 1:1), Lhagao Theng Pathen in kihilna akhohsah in (Jn 14:26; 16:13; I Cor. 2:12-14), Houbung in kihil akhohsah e (Acts 2:42; 6:1-2) ti kichentah in akimudoh thei e. Hiche tilouvin jong Kipana Thupha Lekhabuho sung a Jesu Zilkung tin 45 vei akikouvin ahin khatveicha jong Thulhangsam (preacher) ti'n akikou kha hih hel e (Mat. 23:10; Jn 13:13). Jesu in Houbuh (Lk 6:6), lampi (Lk 24:27), Houin (Lk 19:47) le khosung dunga (Mk 6:6) Pathen thu anahil e. Hiche a kon a mudoh chu Kihilna kiti hi Bible in adoisangpen khat chu ahi.

Ipijeh a theological degree ngaikhoh ham?

Practical reason chu ahileh Pastor khat hina dingin theological degree angaijin ahi. Seminary pha a nakai leh ministry a dinga nakigon na hoiding ahi. Pathen thugil leh mihem hinkho a mopohna neiding khat chun kichuhna pha anei masah ngai ahi.

Tulai ahi seminary a kihilna ho hi ministry a dinga relevant hinam?

Tulai hin mijousen Bilbe asim theitan, Bible commentary leh theological dictionary leh lekhabu jatchom chom jong asim tauvin ahi. Ahin, Bible jilna kisuh neilou hon Bible interpret bolding dan ahepouvin, Pathen houdan leh hetdan akum kum a ahung kikhel dan jong ahethem pouvin, Pathen thu agilje leh ajao jedan jong ahethem pouvin ahi. Ajil nahilou leh ipi theological view nanei ham jong hethem theipon nate. Chuleh, seminary a phatah a trained nahi a kona Pathen thua dettah leh thuh tah'a kibulphuna nanei thei a hiche chu midang nahilson a napehson theiding ahi.

Ipijeh'a KBC in Seminary inei'u ngai ham?

Houbung Pilhing

Houva kiloikhom'na Organization pilhingtah khat'in Theological Institution (Bible College/

Seminary) pilhing tah khat anei teiding dol ahi, hitobang nei hi Organization dinga khantou machalna le pilhin bena lentah khat ahi. Hijeh chun KBC in jong hicheh hi aneilouva thil khoh tah (neilou theilou) khat ahi. KBC hi sakho kiloikhomna pilhing tah khat ahinatos kilhon'a KBC Houbung miho le midang koi hile angaicha chan Theology lam'a kichuhna pedinga lomtah khat ahitah jeh'a hitobanga kichuh namun (Theological Seminary) khat bol-lou/neilouva khoh ahitai.

khantou-machal dungjuuin KBC a natong ding adeh'a Pastor ding khat chu B.D/M.Div noiya kilatalou ahitai. Hiche dungjuia hi, amun Houbung (Local Church Level) geiya lamkai/Head Deacon hojeng jong lhagao hinkho kitup ahina chung chon in Theology lam'a Degree nei (Basic Training chai ahiloule B.Th. beh chai) ahitei angai tai. Hijeh chun hitobanga kichuhna mun Bible College/Seminary pilhing tah khat neilou khoh ahitai.

Houbung dinga phatchomna

Bible Kihilna houbungho ilhahsamnau pen khat hi ahi. Houbung sunga Chritian Education (Bible Study) lampang hi ahat leh Houbung dinga damtheina le hatna hipen ding ahi. Muslim ho le Judaism hon chapangho kihilna anei un alenho kihilna jong

ane un hijeh khun atahsan nauva kon in amoh pullhah joupouve. Kihilna kiti hin mihem tahsan le lungput aphudet pen ahi. Tulaiya Chritian phabep hi Pathen thu hetgilna neilou ngen tobang ahitan chujeh in houbung khat a kon a khat a choplut jong khoh asapouvin ahi. Tahsan khanletna ding le dinmun kichetah nei jing dinga Houbung le gam sunga Bible themzilna hi ngaikhoh jing jeng chu ahi. Hettheina ding chun "Hil" (teaching) kiti thucheng hi Bible sunga 200 vei akimu in ahinlah "Thusei" (preach) kiti hi 140 vei bou akimu e. Thulhangsap (Preaching) hin thu aphondoh mai mai ahin ahinlah Mihil (teaching) kiti hin mi ahil a, aseichet a, akhoukhah a, chule akikhanlhit sah ahiye.

Damtheinapen ahi

Bible sunga society ham nampi ham ahiloule Houbung sempha a kiheho hi abon chauva Bible phatea sim a kholgilho ahiuve. Eihon jong ithinkhou, i society u, i Houbung u, i namsung u isemphat nom uva ihat nom ule Pathen thu nasatah a ikichuh diu ahi. Houbung hi Pathen a ahin hiche jeh a chu Pathen thu dung juiya kisémpa ding ahi. Angai ngaiya um ding ihipouve. Pathen thua khang tou ding ihiuve. Hiche na dinga chu houbung sung a Bible Study (Teaching) hi phatah a boldoh ding, ahil hon jong pha-

tah a hil ding ahi. Pathen in kihilna manlut dan hetna dingle boldoh theina lungthim eipe tauhen. Ajuh chu hichun houbung ahatah a apilhinsah ding ahi.

Pathen Lengam machalsah ding Seminary a hungkai hochu Pathen thugil khumpih hiuvintin, hiche thugil chun a hinkho u chuleh athil mudan u jaosah inte. Bible thugil ahethau chun Pathen natong a akipehdoh nau asuhdet a asuh hat ding ahi. Seminary in amaho chu akhel lamdang ding hijo louvin, amaho a um Pathen thilpeh le kouna chu asuhhat pih'a asuh lamjang pehdang ahi. Chuteng, Pathen lengam natoh chu tha apehbe ding a machalsah ding ahitai.

Overflowing Church

Lhagaova dimset Houbung hoa kona letlha hochu avela um Houbung le midang hochu chanpha achansah diu doltah ahi. Aje-hchu, KBC Pathen in Houbung lenloipen khat le pilhingtah khat a eisem uhin mopohna jong lentah ichung uva akoi in ahi. Pathen phatthei boh ichan uhi midang dinga phatthei boh channa ihu angaije.

Lamkai ding semdohna

Theological Seminary khat inei uva, angaichat dungjui a Faculty Development a dinga Training aban ban a akichebe teng KBC a

kona thepna lam'a Theological Degree sangtah tah nei hung kipepdoh tam intin, National le International level geiya sinthei um Qualified tah tah mi jong ihung umdoh diu, chutengle natoh na lampanga ponbuh keh letna lampi phatah khat jong hung hiding ahi.

Seminary aphantom na ding ho

1. Mun gamla tah a kalsong talouva eima gamsunga Bible sim thei hiding ahi.
2. College akon a simlai tamtah in Pathen thu dihtah ahin kihetdoh ding u ahin amaho chun muntina alhangsap ding u ahi.
3. College aumjeh a ziklung le lhacha tamtah in tohmun amu ding u ahi.
4. College kinei ahitah jeh a thuhil kitohmo behseh um talou ding ahitai.
5. Eima gamsung a chuleh eima context a kisim ahijeh a asimchaihon apet pet a gamsung a amanchah jeng thei ding u ahi.
6. Khatvei leh BD/MDiv/Doctorate degree hung umdoh ding, thil lentah tohdohna mun hung hiding ahi.

Tutua Shalom Bible College in atup le ado

1. Houbung leh gamsung lamkai ho kichuhna peh a chuleh

seminars, camps, Bible study leh training chom chom pehjing ding.

2. Amun leh aphant a um Houbung miho Pathen natoh kinsah na peh ding.
3. Christian te tahsan thudol hetcheh sel a hichea kona chu changval, houbung, chuleh mi jouse hop a manchah jedan leh hetsah ding dan jilna hoitah a pehding.
4. Simlai ho houbung leh society a lamkai them hina dinga hetna leh thepna ho kihilna peh ding.
5. Pathen thu lhangsap ding dan kichuhna peh a India leh gampam jenga jong missionary natong thei dinga kihilna pehding.
6. Bible leh Pathen thugil a kona Houbung miho vetkol ding dan, thusei dan, lasah dan, chuleh lhagao hinkho vetkol leh vahkhang jedan kihilna pehding.

Thuchaina

Thil kiti hi ibol loulai sea bollou hijing jeng ahi; ibol tengle ibol dungjuiya machal bena le pilhinna lam manona achamlouva umjeng ahi. Hijeh chun, kisol lelina le kitahsan lelina lungel ho pailah'a, kilung khat tah le kitosot tona pum a, Pathen tahsana chuleh Ama a kingaijing puma tohpat jeng hi machalna le tohga sona hiding ahi.

MIPENGTHAH KHAT DIA TAONA AKHOHDAN

Nangho Taona a pangdet jom jingun. Col.4:2.

*Evan. PL. Kipgen
Chaplain*

Elijah Prayer Mount (EPM) Gothol.

SERMON

Pastor khatnin athusei na khatnah "Tulah kaboi behsetnin Taona jeng jong kakiman manpoi" atin ahi. Adihtah mong ahi. Tulai i-Christian dinmun nuhi ivet leh ikisalel theival luvin Taona cha jong kiman manlou itam taovin ahi. Hijeh hin, Pathen dongman lou khopma iboi jeh un, hiche iboipihou i-Christian hinkho suboi le sumolphouvin ahung le pankhah theijin ahi. Hijeh hin sopite ho taona thua hin seiding tamtah umjongleh, taona akuldan athah a igeldoh diu deisahna jallin anoija hin point themkhat kahin tah langin ahi.

LHAGAO MITAH A I-HET HOU LHUHLHAM NA JEH:

Tulai vannoi akhantou toh dungjuijin, thusei, lasah chuleh boltheina sangtah tah inei gam taovin ahi. Ahin hicheng ho lah jeng jong chun lhagao mitah le doh le tunna ineijiu aum kit nalaijin ahi. Hinlah vangset umtah in tahsan tah le doh le tunna igelhou, iginchat uleh ikinep piu toh banglouvin lhepnan ahung lhalhum kha atam thim tan ahi. Ahin loikhat chu molphou dohlouva kisel ham ham aumin, ahin loikhat vang chu, Pathen mit mua akisel dohjou lou phat nun ahung molphou doh khaji taovin ahi.

Ahileh ipi itidanna thusei, lasah Degree sangtah neija bolthei ma ma jeng ho chu, chonsetna hung lhalut khaji hitaovin tem ? Sopite thildang jeh ahipoi Pathen toh akigui jopnao "TAONA" anatan khaji ahitai. Jesun seijui ho jah a chun Lhepna a nalhah louna dingun, kigingun Taovun atin ahi (Matt. 26:41). Achuti leh lhepna a lhalhut hohi ataolou tina hijeng louding ham, hijeh hin Pathen thu hihen tahsa lamthu hijeng jongleh kisah lel na ijat nei jongleo hen taona toh lleh thei ima aumpon ahi ti hi athah in geldoh kit hiute.

NEIHIN KOUVIN:

Pakai Pathenin neihin kouvin keiman nadonbut ning ting, nangman nahet khah louhel thil nasatah kisel guh chu naseipeh inge (Jer.33:3). Pathen kithopina ngaicha jingho dia hiche Bible chang hi Pathen contact number ahi -kouvin dongin, thumin aman napeh ding ahi. Eiho din Pakai komah thil kiselguh tamtah aumin ahi ti imuchen nun ahi, ahin koiho chang ding ham itileh Pathen koujing/Taojing miho bou chang ding ahi ti imuvin ahi.

Igam sungu i-Houbung sunguva lungdon um kasah tah khat hi, Pastor, Head Deacon adang dang, Pathen thu seiding kigo, ahivangalah Bible simma taona puma seiding kigontup atamlou hi ahi. Kelngoite vahna dia Pathen koma taona puma akigot louleh, itibah Kelngoiten Anlui/hamgo chu adu a oiva ding ham. Hijeh hin sopi te thusei thep le theplou chu Pathen talent hop dungjuijin ase themjep mong chu umnante, hinlah lunggil tah a Bible sima taona puma Sermon kigo hovang Pathen nin amangchatei jin athu ahing jep tei teijin ahi.

Chuleh houlamkai hoseh hilouvin Houbung mi thuseina ding phat kipe ho jong atamjo achutima ihikit nun ahi. Hapta khat haptani masanga thusei ding ahi kihet ta, "Pulpit na ahung dindoh doh leh ipi ahinsei masat pen em ti ingaileh" Pastora/Head Deacon

pan phat eihin peh a pat chun kalung akhamin ipi kisei ding ham kahepoi" hiva lungdon umpen chu, seiding ihetlou na kah a Bible sim'a ikigot nao le taona puma ikigotnao thucheng akijah doh louhi ahi. Taona pumin Bible simin kigon, Pathenin seipeh dingin eingah jingun ahi, ibol itoh imalam jousea Pathen kou hiutin dongleo hen, aman ma eipui taovinte.

MATHEW HENRY TAONA NGAISANG MIPA:

Mathew Henry kitipan hitin ana-seijin ahi, "Bible is a Letter God has sent to us; Prayer is a Letter we sent to Him" Pathen mipan aseima bang hin, Pathen nin eiho simdia eipeh'uhi Bible hi ahi, chuleh taona bou hi Pathen jahdingleh simdia eihon ithot/ipeh thei'u Lekha ahilou leh thucheng ahibep min ahi. Achuti leh Bible simlou mipengthah, Pathen toh kihoumat lou mipengthah alhagao hinkho i-atidem geltemu hiute. Kaloi kingaipi tah khat haodoh ding tupnan sumlo in achedoh in, kahao tokah in hung kileponge atin, aloi apai Anu Apa koima toh kijah tona anei tapon, 1993 vel chun khatvei amel amujap mun, ahin vangset umtah in tunichan hin ahingham athi ham ti ima akiphochen tapon achung chang thu koiman anung jah tapon ahi. Kaseinom chu anu apa toh kijato lou bon aboi leh, Pengthah sa khat a Pathen asempa toh kijato khalou chu athi ham ahingham kigel phat ngai ahi.

PATHEN THU AHINA BANGTAH'A SAPPHONG THEINA:

Mitheng Paul in Colossae mite henga hitin anaseije, "Christa thugil... kaseiding dol tah a kaseija, Pathenin thuseina ding eihon pehna dingin nei taokop jingun" Hiva hin Pathen thupha ahina bangtah a iseiphong theina diu jong taona angaije ti kicheh tah in imu tavovin ahi. Tulai hin kipa umtah in Houbung atamjo hi Pathen natoh na lam sum le pai lamah ikitettho thei taovin, ahin Houbung atamjo hin pehdoh atamval le tin aphunnoi itam kitnun ahi. Ahideh in eiho KBC sung jong Mission natoh na lam mah nasatah in imachal l'heh taovin, sumle pai jong tamtah tah itohdoh jou taovin ahi. Ahin sopi teho hicheng ho jouse chung chon jong chun, Pathen lenggam machalna din ibatnu lentah aum nalaije hichu "TAONA ahi.

Thusim khat aumin, USA a Meithai khat hin Missionary mi 7 asoldoh in, hichu akiletsah pilheh in ahi. Ahin agel bangin a Missionary ho a konin lhagao mangding amatnao tohphon ima ajatapon ahi. Ahileh ama jong alungdong l'heh tan, jankhat hi imumo hel in paisa hijat jat kisenga tin, lungdongin alung ageltan ahileh Pathen lhagaovin ahoupui dungjuijin taona a anung ajuilou chu ahin kimuchet tan ahi. Hiti chun amanu jong mitlhi pum'a Missionary asoldoh ho dia ahung-

tao chun, niseh in Missionary ho a kon chun lhagao mangding amat thu ajatai akitin ahi. Tunin jong Pathen lenggam na itohnaova hin nei le gou sumle pai jong chu athupi pen ahinai, ahin taona a anungu ideldiu ahi tihi imu chenun ahi.

THU KHUMKHA:

* Taona lhahsam jeh a Tahsan cha/ Mipengthah tamtah l'hepna a alhah l'hum jing pohnatna jallin, 'TAHSAN CHATE KIGING PHAOTE' ti Ng. Nengboi Mate in asah khu kanasemin, athah beh a anangai ho jousen kitilkhouna a inei kit diuin temna kahin neiye. Ahitah bah mongin l'hepna thoh jouna dia akhoh pen chu Taona hi ahi.

* Pathen lhacha ho jousen Pathen lenggamna itoh naova hin, aneipa Pathen dong jingleo hen, agam na itohnao machal jingin tin, ahin aneipa donglouva alengpi lei natong hovang losap nan ahin juitei ding tahsan aume.

* Houbung mitheng teho Pathen lenggam natohna a sumle pai tha le jung tampi iphaldoh uva, cholta le gimtah ikisah nung jengu jonghin, bat lentah inei nalaijuve hichu taona ahi. Itoh houvin ga tamtah asepdoh theina din taonan ponpan tah in pangjing hiute.

Kakipah'e anasimdoh ho jouse Pa Pathenin phatthei boh cheh taovin, Amen.

THILPHA BOL DINGA SEM IHU HILOU HAM?

Juliana Doungel

Literature & Publication

Mihem hohi ipen masang uva patna Pathen in ihetsa u ahi. Aman abon a agontoh'a leiset mihemte lah'a ihungjao u ahi. I-nu oisunga kona ihung kijildoh dan ho, naosen neocha a kona ihung khanlet dan ho jouse igel a ahileh eiho hin panna khohtah neiya Pathen in eisem u ahi ti bailamtah a hetthei ahi.

Pathen in iboncha uva eisem u hijongleh, muthei le hetthei chu i-dinmun, I hindan, hetna/chihna ho, I mihina chule hinkho Mandan jouse vang akibangpoi. Mikhat chun keivang kagenthei e, ka lhasam e, ka lhingl e, tia aseitheina ding ajeh tampi vang umnante, hijeng jongle mihem khat'a ihung pendoh tahjeh uchun Pathen in boltheina jatchom chom vang eipe cheh uve.

Hiche article a kahin tahlng nomen chu amichang cheh hin panmun loupitah ineicheh uve ti hi ahi. Hiche ipiham iti'a ahileh Pathen loupina tahlng theidan lampi tamtah aume – sum le pai, thil le lo lang ahipoi. Midang dinga phatchomna, mi kipahsah theina, lungmonsah theina, lungletsah theina chule theilpha tamtah bolpilh theina tha ineicheh uvin ahi. Koiham khat koma tuni chu nahoi chom'e iti jongleh mi kisukipah thei ahi. Nang katokhah chu vangpha kakisa e iti jongle ami dinga chu nom ahi. Itoh nabah nah um? Naphat phat u hina chuna? Iti jongleh mi kipah ahi. Min boina ato jongle hung pha pah nante hethem ham ham in iti jongleh lungmon chomthei ahi. Mikhat thilpha achan teng jongleh kipa aume, nahapan jal'a nachan ding lomtah nachan ahi tia iseithei le mi kipahji ahi. Akiseinom chu mikhat in midang khat chung a ama anop pouleh kipa lungnopna abolpilh thei ahi.

Langkhat a ivet'a ahileh a phalou bol in kate iti jongleh eima chung cheh'a thaneina inei uve. Mi chung a thil phalou alhuna ahijongle namaikhah chu, nachuti ding kahetsapeh peh ahi tiho jong akija jin ahi. Hiti joh hin, ahilouleh chutijoh chun anabol/anasei jo le-chun phading hija tiho jouse hi thu ngainom umlou, ima abahlou vanga mi sulungneo a pangthei ahin seitam loujoh phaham tin kagel in ahi.

***“Amichang cheh hin
panmun loupitah,
Midang dinga
phatchomna, mi kipa
sah theina, lungmon
sah theina, lung letsah
theina chule theilpha
tamtah bolpih theina
tha inei cheh uve.”***

Tuhin thilpha ahilou leh ase boltheina inei uve ti ihe uve. Hicheho jeh'a inei ilo mia mang ding ahipoi. Amavang mi lungthim tongkhathei ahi ti kicheh ahi. Thil loupitah le lentah jong ahipoi ahin thil phatah le phaloutah a mi tongkhathei

ahijeh chun chingthei uhite. Thilpha bol dinga sem ihu hilou ham? Achutileh, thilpha bol go u hite. Apha bol a ipan theilou u jongleh thipbep chan um uhitin, ase bol invang pang poute ti kaseinompen ahi sopiteho. Pathen in phatthei eiboh cheh uhen.

CHIMTIH NEI LOU VIN TONG JING UTE.

Lamkai masahon KBC ahin phudoh uva pat in mission toh gon ana nei peh un ahin pilhing tah a mission dept. hung umdoh na hi 1980 kum chu ana hi. Rev Jangthong Haokip mission secy masapen ahung hin hia kon chun mission natoh na hi ahung machal jing in tunin pathen lungset nin local evangelist ho jaonan

Manipur Meitei field a mi	-	11
Manipur Nepali field a mi	-	7
Arunachal Mishmi ho laha mi	-	4
Assam gama mi	-	4
Nepal mission field a mi	-	4
Sikkim a mi	-	2
South East Asia gamma mi	-	6
China gama mi	-	1
Manipur Kuki Area a mi	-	6
Myanmar a mi	-	4

Association dang ho toh partnership a toh khom pi mi -7 chule mission agency dang a pathen natong ho simlou vin missionary 53 inei jun ahi.

Hiche hin avet sah chu pathen natoh na ahin KBC in boundry anei poi, chile nam khen lou va jochanna gamthim salvah nadia pan hin la jing ahi. Chuleh bible a Jesu christa in Ana tong jom dia einganse nao va jong vanoi leiset pumpi hopa tong din einganse uve. "nangho cheovin namtinna mijouse seijuijin gasemun..."(Matt.28 18).

Mihem in pathen na atoh dan hi bus chung a atou peta teh se or naopo nupi khat atou na aotpeh, dukan sum hung kileval imden louva ale peh kit,vaicha genthei kitho pina thil peh anei etc etc.hojouse jong mission natoh najeng ahin,hilai khulai tinading um lou joh ahi.Chule chutabang ma a chu houbung in hetthei tah a mission na atoh najong pathen nganse na ahijeh a kitong ahin kiletsah pidinge hoitho na a nei ding khat cha aum poi.

Houbung in mission na itoh u hi houbung mi jouse lhagao din mun het doh na khat jong ahi.Achat jing houbung ihu hinam?Achat jing houbung

kiti hi akhang jing houbung tina ahi. Achat jing houbung chu mission box kihon na a pilhing ,vaicha genthei kitho pina a lung lut chule lhagao hinkho gelkhoh houbung kiseina ahi.

KBC Houbung ho lah a hin kumkhat sunga mission box ni vei hong loi, thum vei hong loi, li vei hong loi, chule 12 vei hong loi aume. Lhaseh a box hong jou kiti hi mission dept. kichol do lou va chat jing tina ahi. Mission box hon kiti hi pakai vantil in aphant phat a siloh tuikul acholing tabang ahi. Akiha choling channa lhagao damlou tampin damna akimu nading lampi kigonpeh ahi. kumkhat a mission box ni vei hon kiti hi achat lou houbung, ahilou leh thimo mana hing houbung tina ahi. Hiche houbung chat jing kiti hi mihem khang a tekah din nungah gollhan lai phat to tekah thei ahi. Nungah /gollhang khat chu angai na a phat sot tah touthim thei lou chat loh jing ahi. Ahin mihem khat chu ahung teh set teng che na nom bol nom seinom tam tah nei jong leh athan ajo tahlou jeh a abol tah lou ahi. Mission box hon dan hin houbung sung dinmun eihil chenne.

Houbung mission natoh kiti hi kivei sah den louva toh ding tham ding anikho aphant dung jui ja toh jing ding ahi. Peh dinga kilom peh a toh ding a kilom toh ding pathen natoh nading a tahsan chaten ahin peh lut sum/thil le lo chu umthim sah lou va man chah ngal ding ahi. Chuteng

le bou pathen natoh chu hung machal in tin atong ho jong anatoh naova kipah a lung mong dingu, chule hichun khantou machal na houbung sunga ahinsodoh ding ahi.

Pathen in Eiho a um bou amang cha nome.

Isreal cha te Egypt gama kon Canan gamjona ahung kitol doh u chun gamthip a neh ding chang lhah anei ta pouve. Hichun pathen in vanna konin changlhah ahin juh lhah sah in niseh a anekhop ding u akilo jeovin, adang chah phat uleh song pi akonin don ding tui alon doh sah in ahi, kum 40 sungin avonu asepon akengchotu akeh pon ahi. Gamtep gam ahung lhun uva a gam ga ahin neh phat un vanna kon manna chu ahung juta poi (Ex.16:14-21).

Hiti hin mihem a kon manchah ding thil aumlou phat le pathen in ama thanei na akon abon chan abopin ahi, hinla hitabang hin phat jousen abolpoi.

Themgao khang: Pathen in Elijah chu Zerepheth khoa meithai nu chule acha pa chu meithainu changbong khutdim khat le thaotui them cha khat mangchan ana vah vai (1 king 17:12,16).

Jesu Christa khang: Pakai Jesun athusei ngaija athilpha bol kidang ho veding a hung chapang khat chang lhah pheng 5 le nga 2 in mihem numei chapang simlou vin 5000 ana vah van aneh moh ujong paipheh 12 jen alohdoh un ahi.

(Matt.14:13-21).

Pathen in eipehu nei le gou mangchan alengam machal na din pan eilah sah nom uve. A hethem lou hon hiche hi genthei nan ala jin lung han na le phun chel nan ala jin ahi. Hichu hilou dingin chanvou loup pathen a kon ichan nao ahijoi. Hiche jeh a chu tunia eiho pedinga ikitil khou jiu ahi.

Pathen a dia thil kipe, na kitong hohi sumpsel tah le itt tah a ipeh a itoh ni aumji vangin, hoitah a ivet le ipeh doh jouse hi nikhat le ivel mu kit din pathen in asei je (Gal.6:7) Kidang tah khat chu pathen in

iheng ikom koma thilpha bol hi lemu kit ding kinem a bol lou dingin eihil un ahin ama adia thil pha ibol jouseu vang tamjo le hoijo a lemu kit din eihil uve. Hijeh chun pathen a din kapei iti hi ape akihi pon Pathen komma kikhoh khom joh akihi bouve. Pakai komma kipaman tamtah munomhon tam tah pehen, chule pathen a dia ithil peh u hin kipa na le lung nachim na eipeh thei na dingun lung thengsel in peo hite. Thilpha bol na lamah chim tih nei lou vin umu hite ilhah dah lou uleh aphot cha kipa man isan dingu ahi. (Gal.6:9)

Houbung Songmun khelna le Baptism



Achesa nisim 7 August 2016 (Sunday) nichun Pashong Baptist Church houbung sunga hetjing na song ana kiphut ho mun khel na le khosung Men Society kum 30 lhina chule houbung baptism program le Pakai Antheng jonna kbc mission secretary pan lah nan ana kimang in ahi. Hetjing na song hohi masang a anakiphuna ho akilem tah lou jeh a tu Houin maija kitoh taha kigoltoh ahin khonunga avethoi thei na dia houbung lam kai hon agon u ahi. Song phukhel ahijouvin baptism program ana kibol in kineppi umtah nungah thumin Apa Acha chule Lhagotheng pathen minin Tuilut na aneijun, nilhah in Pakai Antheng jonkhom na jong aumin ahi.

“MISSION ENHANCEMENT SEMINAR 2016”



Achesa 20th August 2016 (Saturday) nichun Kbc mission Dept. Mopoh na noija “Mission enhancement seminar” KBC chapel hall a anakimang in ahi. Hia chun Rev.Helen Singsit North East States Regional promoter FMPB le Rev Brian G. Atana ministry training centre Shilong, resource person in apang hon in ahi. Rev Brian Manipur gamsung thuboi jeh in tahsa tah in hung lhajou tahih jong leh Telephonic Class ahin lan kipa aumlheh e.Lungjin nan agam mi kidim tajong leh convention ngailut na le pathen natoh machal ding deisah jalla evangelists ho tilkhou dia hung kalsong Rev Helen Singsit chung a mission board in sangtah in kipa thu akisei jin ahi. Aman FMPB missionary ho natoh lolhin na thuguh ho eiho Evangelist ho ahung seipeh hi man tamtah ahi. KBC evangelist manipur sunga umho mi 20 lang ahung pang thei jun hinla mi phabep vang bandh jeh in ahung pang thei tapoi.Lolhina eipeo Pathen thangvah in um taken.

Nepal gam’a kona Houbung mite lekhatot



Muntin a KBC houbng mite chng ah kakipana kahin phng e... Nang ho jouse tao na jallin janni 11/7/16 nin anoi a kahin tah lim nupa te nin jng Dam sung a Jesu Christa a din kigel lhah na anei lhn tai, Thilpha sim joulo ei chan uva Hatchungnung Pa Pathen thangvah in um hen. Kakipahe,

Pakai leng gam a dia solchah

Pr. S. Lunminthang Haokip@ Shingsei John
Panchthar Mission Field(Nepal)

SEA Missionary

Chomcha kaum sunga kahetdoh phabep

Gl. Hahao Haokip, Missionary to Cambodia.

Thumakai

Kaneo lai in Pathen thusei hon Missionary minthang ho thusim anasei jiu kanajan, eijong Pathen na kitongin tin missionary a kiche inte tijong kagelna in anapang poi. Hijongleh Pathen thilgon le ei gon ana kibang pon, Pathen phatsahna jal a tunia Pakai na tong thei a kaum jeh in Pathen kathangvah e.

I. Missionary dinga kawai kondoh dan

Master study in Missiology kanasim in hichu Mission natoh lampang simna ahi, ahin Mission lam natoh kasim vangin Missionary din kana kigopon ahi. Ajeh chu Missionary ding hin theological background seh hilou a thepna(talent/skill)khat jong nei angaidan kamun hijeh chun kana kisongpun ahi. Hitia kisonglal puma kaum laitah in SEA Missionary dingin opportunity KBC akon in ahung um in theological degree chaipan kahin ahinlah Evangelistic works or ministry chom chom a experience neilou lai kahi toh kilhon a India gampam a chedi chu excited jong kahin chuleh kisonlalna jong ana dimset in ahi, hijeng jongleh Pathen in opportunity eipih hi lhaso ding kanompon kaki gellha ngal in tun missionary khat in Pathen na katong thei in KBC chungu jong kakipana alen in chuleh KBC jal injong Pathen kathangvah e.

Kumni hung lhing ham² missionary natoh sungin dammo na neo² ahilouleh insunga thina manna tailou in a gammi(local) ho akon in suhgentheina/engbolna ima umlou a ministry kibol jing thei hi kipana lentah khat ahin hijeh hin Pathen thangvah in um hen. Phat chomcha hijong leh mission/missionary toh kisai a kahet le kamudoh neokhat kahin tahlang nom e.

II. Sacrifice

Missionary lolhing khat hitheina ding hin sacrifice angai mama in ahi, missionary khat ding in a thanopna khat sacrifice ngamlou leh missionary na lolhing tah a atoh joulou ding kamu doh in ahi. Insung, gollepai, comfort zone tampi sacrifice boldi aum e. Zebedee chapa Jacob le asopipa John in anatoh khoh laitah hon adalah a Jesu nung ajui jeng lhon tobang hiding ahi.

III. Theological background/Talent,skilled etc apoimo dan

Theological degree neiseh missionary or Pathenna tong thei ahipoi ti ana kihenan ahin tun vang practical tah in akihe chen in ahi. Ajeh chu

nissionary field jousea hin theology alutlouna jong aum in ahi, theology background iman thei-tah louna mun ahung hikhah le ipi kimangcha ding hitam? Hijeh chun music thep lasah thep ahung ngaitan ahi. Lasah thepna le Music thepna ho mangcha a missionary na tohthei mama ahi. Chuleh mun phabep a soccer hi angaisang uvin hijeh chun football skill/talent neiho dingin interest umtah khat ahi Soccer Ministry tia Missionary na jong tohmo ahipoi. Hitiho hi ki-nei henlang theology background toh kithole nasatah in natoh jong machal inte ti kamudoh in ahi.

Phat ong kanei kah in Violin kanajil in ahin dammo jeh in Violin ojapi chu a inlam(korea)ana kile tan ahi, amahin theology background aneipoi ahin Violin master ahin Germany a kum 5 training nalah a hiche Violin athepna mangcha a muntin a "Missionary as a Violin teacher" a muntin a achethei in ahi. Gam khangtou holeh mi khangtou hohin lekhasim seh seh hi education in agelbeh pon music, sports, etc hojonghi a part of education in ala uvin master chan patah in aboupi ngap uvin, khonung le hiche a master uchu missionary natohna or natohna chom² in amang thei uvin ahi. Music thep sports thep hin advantages tampi aum in, missionary dinga naki got khah le music basic beh hetding ngaito in.

IV. Korea te akon jildoh thei kamu khat*

Korea tehi traditon & culture ngaisang mama khat ahi uvin, hichetoh kilhon in mission natoh jong angaisang mama uvin ahi, amaho natoh hi athupi in, akiphah uvin, sumle pai aseng uvin hiti chun mission na atong uvin machalna jong nasatah anei uvin ahi. Korea te chu rich country khat ahin eiho to tethei vang ahipoi ahin athupi pen a kamu chu ahile "mission minded" ahidan u khu vetton thei tah khat in kamu in ahi, eiho jong korea te banga every individual, every church in mission lungput ha nei in nei leu hen mission natoh machal tei tei ding ahi.

Achaina

Missionary natoh hi anom in hinkho kipana aum in, lungmon aum in ahi, ahin mihem akihi nahlai jeh in khatvei kom² le thasetna lunglah daina jong aumda jipoi, Pathen lekhabu a kimu "kipana thupha seiphongho keng iti hoi hitam". Hiche thucheng hin kahatmo ni, lung lhahdaina kanei teng nasatah in ei lhamon jin, eihatsah in apang jin malam akino jing thei in ahi, KBC gamsunga um minu mipa nungah gollhang pilepu hon taona a neigeldoh jing u kaja jing in, nangho jal injong Pathen kathangvah e. Chomcha kaum sunga kahetdoh kham² kahin sut hichen ahin, Pathen in ebon uvin phatthei eiboh tauhen.

MEN COLUMN**KIPA THUPHON**

Men Department One Day Seminar chu August 4, 2016 (Thursday) nin KBC Office Chapel Hall munna Rev. N. Haokip General Secretary, KBC in Devotion & Men Dept. Olympic DVD Releasing



abollin, chule Rev. Dr. Letkhotang Haokip Principal, MTC in Domestic Violence and Christian Response ti chungchang alan, Rev. Silas Jangminlen Haokip Director, Shalom Bible College (SBC) in Bible dungjujia Deacon natoh le panmun ti thua aseijin, Rev. Kaikhokam Chongloi, Secretary Men Department in How to Develop Men Department kiti chungchang nga houlimna aneijin, chuto lhonnin Miss Thengnu Haokip in Pathen vahchoila asan, chule Gambih Men Work Committee, Centre Church Men Work Committee le Pastor ho akingaichat dungjui uvin mi 95 vel ahung pang thei un, chujongle Office Staff ho hihen lang amunna akhoh dungjujia akingaichaho jouse in jong pan alah jeh uvin lolhingtah in akichai theitan, hiche a panla ho joise le ahungho jouse jalla lolhing ahijeh in amaho chungga kipa thu akiphongin ahi.

Achainan Sponsored hinbol Shalom Bible College KBC & Rural Community Development Society ho chung nga jong kipa thu akiphong nge.

Rev. Kamboi Chongloi
Secretary, Men Department, KBC.

7th August, 2016 Sunday nikho a

Lydia Resource Centre te Tour Report Kipa thuseina

1) JIngkah in KBC C/C New Lambulane Houbung mite le KBC Women President, V/President, chuleh Secretary jaona in Lydia Resource centre mun a umho toh Joint Fellowship akinei khomin, W/Secy, Ng, Anem in "Christiante kinepna" ti thupi mangcha in tilkhou na thu ngeitah aseijin, Church Choir ho le LRC nungah hoa konin Labung ngeitah tah akingai lhan, Pathen umkhompina akichangin kaikhom nomtah in akichaijin Pathen thangvah aume.



Houbung miten ngailutna Ankong jong eisempeh un, chuleh LRC kithopinan Rs 10,000/- ahinpeuvin, Pi Mawite Doungele in Rs 5,000/-, Pi Juliana Doungele in Rs 5,000/- ahinpe lhonin, Pathenin amithengte jouse athil phabol nao chungga phat theina thalhing set in pecheh tao hen. Kakipah uve.

2) Vai kaikhom Meitei Baptist Church Soibam leikai Houbung mite toh kanei khomun, Pathen jallin nomtah in kaki mangchaovin, W/Secy, Ng, Anem in Pathen thu "Iswargi Aningba thijinba" ti thupi mangcha in houlimna aneijin, Vahchoi la LRC ho konin Manipuri la Group le Solo chuleh amaho akonin Solo khat le Duet khat labung lijen akingailhan Houbung mite jong akipah thei lhez un, kaikhom kichaijin mipin chadon khomna einei piuvin, amahon jong Lydia dingin kabol theipenu tin

Rs3,000/- ahinpeuvin Pathenin Soibam Leikai Meitei Baptist Church Houbung mite jouse phat thei boh jing tao hen.

3) Sun phat on sungin chapangho tahsa kisuh halna dingin President nun sight seeing chena ding eina gonpeh uvin Mellenium Garden le Rose Garden a kacheuvin, Lydia Resource Centre a um chate nao teho toh nomtah in phatchom khat kihui lhana, kisuh halna kaga mangkhomun amahon jong ahin khouva asuhmil thei loudiu phat chomcha hijongle phat kilem tah eipeuvah Pathen kathangvahe.

4) Nilhah kaikhom Baptist Church Chassah Avenue Houbung mite toh kakimang khomun, Pathen thua NI. Vahboi Baite Warden LRC in " Mihem hinkho chomcha " ti thupia mangin tilkhouna ngeitah aseijin, Pathen vahchoi la khonei langa Church Choir hoa kon le Solo khat akingaijin, Lydia hoa konin Labung khat le Duet khat to Solo khat akingai lhan Pathen lungset in Programme lolhing tah in akichaijin Pathen thangvah aume.

Nilhah in ngailutna ankong Pu Letthang Haokip le ainsung miten Deacon Board ho toh nehkhom eisem peh un, chuleh Houbung in jong Lydia a dingin kithopina Rs 10,000/- ahinpeuvin, Pathenin Houbung sung le Head Deacon te insung phatthei boh jing tao hen. Nachung cheh uva kakipah uve.

5) Nisim 15th August, Monday nikho hin KBC C/C B.Vengnom Pastor Rev. Tunlal Haokip le atohkhompi Deacon Board hon Lydia Resource Centre vilna ahung neijun, Pastorpan chapangho tilkhou nale taopeh na aneijin, chugoh hilouvin kithopi nan Anchang kg 40 le suma Rs 1200/-jong ahinpouvin, Pathenin C/C B.Vengnom Houbung mithengte jouse phat theina thalhingset in pejing tao hen.

Achainan, muntin a Houbung mithengte hon Society level hihen lang Houbung le changval a hijongle Nute Project lenpen Lydia Resource Centre a dinga natao nao le nathilpeh houvin eikipasah un, eisuhat jinguve, chuti ahijeh chun nangho jouse chung a kipathu hiche KBC Thuso hi mangcha in kakipanao le kalung lhai nao thu kahinphonguve. Pathenin phat thei naboh cheh tao hen. Neitao peh naole neitil khounao kangai cha jinguve. Pathenin ikiloi khomnao Kuki Baptist Convention phat thei boh jing taken.

WOMEN WORK COMMITTEE TOUR REPORT

Amasan penin tuni chan a eihin pui hoijingu Pa Pathen mintheng thangvah le vahchoijin um jing taken. Assembly kiphat sahna bangin tukum 2016 kumsung hin Women Work Committee hon Tour akibol in noija Gambih ho a hin akichen anoija hin akichena ho bannei chan Report kahinpei.

1. N. Mollen B/Church, Gambih No.1

May 15th, 2016 Sunday nikho hin Gambih No.1 Tour N. Mollen B/Church mun'a Gambih sunga Houbung jouse a konin Nute hung khom ho to kaikhom na akineijin, W/Secy, Ng. Anem Haokip in Pathen thua houlimna aneijin ahi. Mipi ahung jousen Pakai jallin nomtah in phat akimang khomin Pathen thangvah aume. Khonei Nute hon mipi ahung kikhom ho jouse dingin jong ngailut na ankong asem un kipah tah in ankong aki umkhomin ahi. Pathenin N.Mollen Houbung le Nute kiloi khomna phat thei boh tao hen.

2. Gopibung B/Church, Gambih No. 5

August 6th, 2016 Saturday nikho hin KBC Gambih No. 5 Tour Gopibung B/Church mun'a akichen, Gambih sunga Houbung tin'a Nute ho to nomtah in kaikhom na akineijin, Women President Pi Boicie Haokip a konin tilkhouna chom cha le hetlouva khoh ho hilchet na aneijin, Pathen thua houlimna Ng, Lhingjanem W/Secy, KBC in Nuten Pakai gam a dinga pan lah ding dan thua tilkhouna aneijin Pathen jallin nomtah in kiman chahna akinei in Pathen thangvah aume. Chule Khonei Nute hon Gambih Lamkai hole Convention Nute Lamkai ho din ankong eisempeh un kipa aumin Pathenin phat thei boh cheh tao hen.

3. C/C M. Thingjabong, Gambih No. 8

August 13th, 2016 Saturday nikho hin KBC Gambih No. 8 Tour Cum Nute An-ngol Taona Programme 07:30 am - 01:30 pm chan C/C M. Thingjabong mun'a akineijin, Gambih sunga Nute jong 200 valjen ahung kikhom doh in kipa aumlheh e. Ng, Lhingjanem Haokip W/Secy, KBC akonin "Nuten I-Insungle i-natohna jousea Jesu No.1 a

pansah lou akhohdan" ti thua houlimna anei jin Pathen jallin nomtah in kiman chahna akinei in, Taokhom na NI Hahat Haokip W/Secy, Gambih No 8 in alamkai jin taona point chom chom a din mipin lung kitoh tah in taogol na akineijin, Pathen thangvah aume. Programme jouse kichaijin, Gambih Nute hon Gambih Lamkai hole Convention Nute Lamkai ho din ankong eisempeh un kipa aumin Pathenin phat thei boh na chang jing jeng tao hen

4. Women Work Committee Member NI.Chinneivah Haokip ADC Member thah kipapina

August 24th Wednesday nikho hin Women Work Committee Member NI.Chinneivah Haokip Manipur Govt, kivai homna noi ja ADC Member khat ahung hina chung a kipapina achenna ainmun Moreh a Maicham sempeh na Lopna in KBC Nute jouse thalhengin Ponve pehna le taona agakinei peh in ahi. Pathen in ama le ainsung mite phat thei boh jing hen lang damtheina le mopohna apeh apoh jou jing thei na din umpi jing tao hen.

5. S. Khopi B/Church, Gambih No. 9

August 27th Saturday nikho in KBC Gambih No. 9 Tour S. Khopi B/Church mun'a akichen, Gambih sunga Houbung tin'a Nute ho to nomtah in kaikhom na akineijin, Pathen thua houlimna Ng, Lhingjanem W/Secy, KBC in Pathen thua tilkhouna anei jin taokhomna Evan. Boinu Mangte in alamkai in Pathen jallin nomtah in kiman chahna akinei in Pathen thangvah aume. Chule Houbung mite hon Gambih Lamkai hole Convention Nute Lamkai ho din ankong eisempeh un kipa aumin Pathenin phat thei thalhing set in pecheh tao hen.

Achainan, Committee member ho, toh le tham khoh l'eh jongle Pakai jalla ahin dalhah uva August Ihasunga Tour Programme kigongho thonlouva pan alah jing jallun kipa thu kahinseijin, tuban a jong pan lacheh ding in tiemna kahin neikit ne. Pathenin ikiloi khomnao KBC Women Department phat thei boh jing taken.

Pakai lhacha,

Lhingjanem Haokip
Secretary, Women Dept, KBC



Zai-Them 2016

FIRST ROUND LOLHINGTAH A KICHAITA

Pathen mapuina jallin achesa nisim 19 August 2016 nikho chun Sadar Hills gamkai sunga KBC Centre Church, Kanggui in Zai-them 2016 First Round ana vailhun in lolhinglhing tah in akichaitan ahi.

Contestant mi 45 a kon'ah Pathen vahchoi lasah kitetna chu sun nilhum in ana umin, Nilhah in jong Contestantho le midang danga kon in jong Pathen vahchoila sahna aumkit in mijousen nom aksan ahi.

Alosam aumlou leh alolhing ding umlou ding ahijeh in Contestant mi 45 lah a chun Contestant mi 13 chu lhenlhah in ana umtauve. Hijongleh lhitheh huina tin dangka Rs. 500/- cheh le Percipitation Certificate khatcheh toh ana kipan ahi.

KBC Gambih No. 5 Pastor, Gambih Lamkai le Youth lamkaihon pan hatah in ana lauvn, gena touna le nehle chah avat umlou, phunna ding umlouvin ana gongtup chet jengun, amaho chungah hin seijoulou kipana akineijinge.

Centre Church, Kanggui Pastor, Board of Deacons le Building Committee ten jong Zai-them a din imacha it umlouhella akingaicha jouse phalna eina peh uva, avat umlouva pan alahnau jong sumil din akigelpoi. Hiche keu hilouva KBC Central Choir ho dia jong gena touna lupna le nehle chah tuitah tah agon nau chungah jong kipana sangtah akineiye.

Zai-them 2016 First Round lolhing tah in akichaitai. Halleluyah!



SECOND ROUND

Zai-Them 2016

@ KBC CENTRE CHRUCH, MOLNOI AREA

LHUNGKIM : 10 September 2016, Saturday

ANIKHO : 11 September 2016, Sunday

KIKHENNI : 12 September 2016, Monday

***Mijouse lem ahi, Hun-
gin Hunglhan, Kisih
Ponnate***

BQ2016

THUA HETSAHNA

Bible Quest hi tukum nisim 2 October 2016, Sunday nikho dinga um ahijing toh lhon in muntin gamtin a Application Form ana kithot ho jong ahung lutjing tan, ahinla ahung lut loulai atamjo ahinah laijeh in amun amun'a lamkaihon nahin boipi uva, mangangtah a Office a nahin lethot diuva temna kahin neikit ahi.

Thudoh umding dan hitin akigonge.

- **Thudoh agom'a 150 hiding.**
- **Thudoh khat mark chun khat cheh apohding.**
- **Thudoh 100 hi Donbutna kipe adihpen lhen(multiple choice) hiding.**
- **Thudoh 50 hi Dih/Dihlou (true/false) hiding.**

Hito lhon'a Admite Card atum'a umtalouding, Application Form ahung lutjat a Examination Center a Thudoh Lekha (Question Paper) kihin thot ding ahitai.

Phaten kigoutin pan ana lacheh ute.

1st YOUTH CAMP, KBC No. 11

KBC Gambih No. 11 Youth Department tohgonna noi a 1st Youth Camp chu M.B Saichang Baptist Church mun a Augsut 12-16, 2016



sung in Thina lam jona cheho khu huhdoh loi in, (Prov. 24:11) thupi mang cha in lolhing tah in ana kichaitai.

Camper mi 200 val kikhopna Camp chu Pastor Letkholal Haokip, Gambih Pastor in Camp Thensona le khumkhana ananei in ahi. Pastor Onkho Haokp speaker, Pastor Satminlen Khongsai resource person, le Gl Haoneo Baite camp director hina in nungah gollhang tamtah in lhagao hinna ana nei thei un chule khangthah hinkho mandih theina ding in kilhandohna ana nei thei un ahi.

Camp kichai nilhah in houin in mi adol tahlou jeh in lentol a kaikhomna akibol in mi 500 vel in kikhophomna ana kinei in ahi. Gambih lamkaiho le Rev. Lalminthang Singson (Retd. Pastor KBC) injong nasatah in Camp a-oup jing un lungmon le kipa aum lheh in ahi. Pathen in gambih mite phatthei boh jing taken, Amen!

Letkhosei Haokip,
Youth Chairman, KBC NO. 11

Jangkhohal Khongsai
Youth Secretary, KBC NO. 11

New Kelthelmanbi KBC No 7 Youth Camp



Youth Camp At New Kelthelmanbi KBC No 7 Achesa 12th-15th August 2016 sunga New Kelthelmanbi KBC Gambih No 7 Mun'a Youth Camp ana umin ahi. Thupi : " Nangma vang Golhang lai lungai lungtup a jonin jamin" 2.Timothy2:22. Speakers Rev Lamkeng Lhouvum le Pastor Thangneo Haokip KBC No 17. Camper mi 80. Pathen lungset in hoi tah in akichai theijin Pathen chu thangvah in umhen. Camper tampin Pakai chu huhhing pu le lengpa a akisan theijun loupi na Pathen a hihen.

Pakai lenggam natoh khompiu.
Pu Nohsei Haokip Head Deacon,
New Kelthelmanbi KBC Gambih No 7.

KBC GAMBIAH NO1. GOSPEL CONCERT LOLHING TAH'A KICHAITA.



Achesa October 28th.2016 (Sunday) nia Gambih No.1. makai na noiija Gospel Concert, Centre Church NGV mun'a kibol chu Pathen panpi najallin lolhing tah in akichai tan ahi. Hiche Programme lolhin na dinga hungkal song adeh a Jingun (Chief Guest) a eihungpan peh u Pu T.Manga Vaiphei Hon'ble Minister PHED, MTDC & Labour, Guest of Honours a eihung pan peh ho, Haosaho ADC member ho, Govt.Officer ho, Social worker ho, Houbunga Pastor hole Board of Deacon ho, chule Mipi jouse, ngailut na neitah a naphat'u man lu tah nahin kaikeh'uva Gambih Conference lolhin nadinga sum le pai ja kithopi na neihung nei jallun, Gambih Executive member hon kipa thu seijoulou Pakai min in kahin phong uve.Chule Vahchoi la ngeitah tah eihung sah peh hou, Pu L.L.Muona, Ng. Jenny Touthang, Ng. Nemsemhoi Haokip chule Ng. Hoineichong Touthang ama ho cheng chungang jong kipa thu sang tah Pakai min in kahin phong uve. Gospel Concert lolhin na eipeo Hatchungnung Pa-Pathen min chu thangvah in umjing taken. Amen

Rev. P. Haokip
Pastor, KBC Gambih No.1.

KBC Gambih No 15 (Moreh Area)

Kipa Thusei

1. Gambih sunga women Dept Chairperson nu.Chinneivah Haokip in chandel ADC member khat chanjou na ahinnei nachunga , atohkhompi gambih sunga executive ahin, departmental jousen jong Kipa pina aki-neipeh in, chuleh Dt.17 August Nia HTC office mun a Felicitaion program Aneina kin ajong gambih in kipapi nathilpeh Aneitolhon in, Pastor Seiboi



Tuboi in kinthempu hinna in vang thumpeh na le Taopehna aneije, Khonung dinga kinneppi umtah ahito kilhon iin. Pathen in avaikon availhun in lhon pi Jing jeng taken.

2. Ningkum august 4,2015 Nia Tamu Hospital a naosen Thum anapeng kopchu, Anu Tinnu le apa Thangboi in hiche thuso hi mangcha in a natao pehhou leh, ngailut na kipa thilpeh peho jouse chule lamchom



choma panpinahin neiho ho chungga Kipa Thu ahinsei Pathen min in kipa thu ahinhot lhone. Pathen in phattheina boh cheh tauhen.

3. PathenphattheibohnaTukum Dt. 14 April 2016 ni in KCC hospital a Gambih Pastor Henkhomang Tuboi le aloinu akon in Cha pengkop numei anei lhonin, chujou vin naosen damlou jeh in KCC Leh JNIMS a NICU ward a sottah anakijenin, hinlah dam domna aumthei lou jeh in Mother Care ICU a nikho sot tah kana umpiu-



vin, Hospital a kaum sungun, houbung tamtah Convention sunga tohkhompiho chule muntin Houbung mi ajapha chanin taona le kithopina thei chanin nei kiithopiuvin, nangho jouse taopeh nale kithopina jallin Hospital kadalha theijun ahile, Tunin hiche KBC Thuso hi mangchan dammona sangtah kanei sunguva eikithopiu hou sumle pai nei le gou taona le lamchom chom a eipanpi hou jouse chungu kipa thu sangtah in kahin phonge. Pathenin phat thei naboh cheh taohen.

4. KBC gambih 15 sunga lhaseh anngo itaokhomna kinei Jing jong Tunigeiyin Gambih mite Mijachunglam in lhaseh leh anggol in Taona ngaichatna lamchom2 in taona akimangkhom Jing in, chuleh mundang Akon apat taona jong ngaichat aumle akimang jinge. Tunichan geiya thon louhella taona a hung kalsong Jing houbung hochunga Kipa Thu ahung kiseiye.

Kakipah e.

PakaiLehMipiLhacha
 Pastor H. Tuboi
 Gambih Pastor KBC No 15
 (Moreh Area)

Shalom Bible College Fall Semester 2016 Inaugurated



2010 akona Shalom Bible College in kumseh a semester ni ana kiboljing C.Th progam chu achesa nisim 18 August 2016 nikho chun Centre Church Salem Village, Sapormaina muna Theological Board Chairman Rev. Y. Haokip in hondohna ana neitan ahi. Hiche hondohna kin a chun Director pa in keynote apen, chuleh Pu Lhunthang Kipgen, Vice President KBC in jilkung hole simlai ho phondohna ana neijin ahi. Tuchung hin KBC gambih chom chom a konin simlai 35 ahungkhom uvin, KBA Nagaland a kon in jong mikhat ahungjao in ahi. Simlai 35 hohi jilkung mi 6 holeh ajenla pang lhacha mi 3 hon nikho 30 sung aboipi diu ahi. Pathen henga taokop uhite.

KIPA THUPHON

1. Achesa nisim 15th to 22nd July, 2016 nichun Sangaikot Centre Church Pastor Mangboi Kipgen leh Men Department lamkaihon, KBC No.18 Karbi-Anglong, Assam houbungho Lhagao leh Tahsa thua tilkhouna ahung neina chunguva kipa thu ahung kiseije. Pathenin phatthei boh jing taohen.

2. Phaipijang Dimapur mun'a um Ni.Chongnu le insung miten, KBC Gambih No.18 Karbi-Anglong Assam houbungho vil/visit ding a Manipur a kon'a hungkon KBC Pastors leh lamkaiho, kipah tah a lhunna leh, Neh le chah a ahin boipi jing na chungu kipa thu ahung kinei in ahi. Pathenin, phatthei boh jing taohen,. tih itaonao hijing taken.

Keima,

Pastor Jamminlun Kipgen, KBC Gb.18, Karbi-Anglong, Assam.

Pu Hentinkhup Kipgen (1941-2016)

Thusim chomcha

Pu Hentinkhup Kipgen kum 75. hi Miss Tingneilhing Kipgen, tutua MBC Women Secretary nu a pa ahi. A inneipi (L) Nengneilam toh Pathen goupeh chapa thum le chanu sagi aneilhon e. Amahi Multi Organ Failure jeh in Shija Hospital ICU a ni li akijenjou vin dam dohjouloudingaaumphat in August 18 nin inlam a akipodoh in inn a lhun chomkhat jouvin Pakoma din anacholdo tai. Pu Hekhup hi Government teacher ahipum in ajochan in Houbung sung le Gambih a thanomtah in Pathen na ana tong in ahi. KBC Singat gambih kiphutil laijin kumsottah lamkai le Choir lamkaijin ana pang in ahi. Pathen natongho tilkhou le atu achate dinga taojing mipa ahi. Pathen angailut behsehjeh a aphatcha akilah ahitai. Pathen thangvah in umtahren!



Kipathuseina

Tuchung kangailut tah kapan eidalhah nao chungu Kuki Baptist Convention a Pakai lhacha ho leh Houbung mihon nei dinpi nao, adam moa hospital a nei taopehnao, nei hung vilnao sumlepai a neikitho pinao man lu tah leh inmuon chan lhunna ding ambulance neilah peh uva, Inmuon a ei hung op peh uva Mbc ka hung kile jouva taona puma ngailut na a nei hung vailhun kit nu chu kagel leh kahin kho lhun kei uva kasah jou diu ahitapoi. Hijeh chun hiche KBC Thuso hi mang chan nachung cheh uva kipathu sangtah in kahin phonge. Pathen in KBC leh Houbung mi ho jouse Phatthei na boh cheh tao hen.

Ms. Lhingboi Kipgen, Secretary Women, MBC

(L) Nu Nemjahoi @ Nenem Haokip Hinkho Thusim leh Lunghempina. (1968-2016)



(L)Nu Nenem Haokip hi 1st February, 1968 nin Hengjang khoa ana peng in, 1995-1997 sunghin Dinwidie Bible College a B,Th anachaijin, 11th June 1999 nin Pastor Jangkholen toh Damlai sunga tahsa le lhagao a innchen semkhom dingin Houdan thenga kichenna Rev. Chungkhopao Haokip Thempu hinan ananei lhonin ahi. Pathen goupeh chanu khat leh chapa ni ahingin ahi. A hinkho a dia alasa nom adeilhen chu Lathah No.79 "Chunga Jerusalem thahchu" ahi. 2016 kumadia a Bible chang adeilhen leh ajingaitah availhahna Bible chu Psalm 73:24-28 sung ahi. Atute achate avelvela asimdo sahchu verse 26 hi ahi.

Anatna- Amahin 2016 January lha a pat Choricarcinoma/ Cancer natna ahinneipan in Insung mite, Sopi ulenao, Nule pa, Pi le pu chuleh gamsung miten adamdoh natei ding deina in Doctor mun chomchom a anakijen inchuleh Pathen kom'ataona in ahinkho ana kichujing ahi. Ahin Pathenin akouna natna ahitah jeh in damdoh jouta louvin 21st August 2016 (Sunday) ni 9:36 pm in achenna B. Aijalon Inmun a angailuttah aji, achate, Insung mite, asopi au anao leh Houbung leh khomite chuleh gamsung mite dalhan pa kom'a Tonsot a choldo din ache masatai.

Editor